

KERATAN AKHBAR-AKHBAR TEMPATAN
TARIKH: 15 DISEMBER 2013 (AHAD)

Bil	Tajuk	Akhbar
1.	41 projek PPR dengan kos RM578 juta akan dibina tahun depan - Halimah	Bernama.com
2.	SME Corp salur RM17.6 juta kepada 114 usahawan di Terengganu sejak 2007	Bernama.com

**BERITA ONLINE
BERNAMA.COM**
TARIKH: 15 DISEMBER 2013 (AHAD)



41 Projek PPR Dengan Kos RM578 Juta Akan Dibina Tahun Depan - Halimah

JASIN, 15 Dis (Bernama) -- Sebanyak 41 Projek Perumahan Rakyat (PPR) melibatkan kos RM578 juta bakal dibina tahun depan di seluruh negara, kata Timbalan Menteri Kesejahteraan Bandar, Perumahan dan Kerajaan Tempatan Datuk Halimah Mohd Sadique.

Justeru, beliau meminta semua kerajaan negeri terutamanya pembangkang memberikan kerjasama sepenuhnya kepada kerajaan persekutuan khususnya dalam menyediakan lokasi yang sesuai bagi pelaksanaan projek itu demi memberikan kemudahan terbaik untuk rakyat.

Halimah berkata kementeriannya sebelum ini berdepan kesukaran untuk bekerjasama dengan kerajaan negeri pimpinan pembangkang kerana meletakkan syarat tambahan dan bertindak melengah-lengahkan projek itu sedangkan kos pembinaan projek PPR ditanggung sepenuhnya kerajaan persekutuan.

"Kerajaan negeri hanya perlu menyediakan tanah yang sesuai untuk projek itu dan tidak memberikan tanah yang terlalu jauh dari bandar ataupun langsung tidak sesuai untuk diduduki," katanya kepada pemberita pada Majlis Pecah Tanah PPR Ayer Panas di Bemban di sini hari ini.

Majlis itu disempurnakan Ketua Menteri Melaka Datuk Seri Idris Haron dan turut hadir Timbalan Menteri Sains, Teknologi dan Inovasi Datuk Dr Abu Bakar Mohamad Diah.

PPR Ayer Panas dibina dengan kos RM80 juta bakal menempatkan 500 unit rumah tiga bilik dengan dua bilik air berkeluasan 700 kaki persegi setiap satu dan dijangka siap sepenuhnya pada Mei 2016.

Halimah berkata kerajaan negeri perlu mencontohi kerajaan negeri Melaka yang memberikan kerjasama penuh kepada kerajaan persekutuan dalam melaksanakan projek PPR itu dan memberikan tanah di kawasan perumahan mewah dan sederhana untuk projek itu.

"Saya bagaikan tidak percaya tanah ini (di Ayer Panas) akan dibangunkan PPR kerana tanah ini bernilai amat tinggi, terletak sebelah perumahan mewah, langkah meletakkan PPR dalam kawasan perumahan mewah membuktikan kerajaan negeri tidak membezakan rakyat yang kaya dan miskin," katanya.

Beliau berkata setiap unit PPR Ayer Panas itu dibina dengan kos kira-kira RM160,000 dibiayai sepenuhnya kerajaan persekutuan dan hanya dijual kepada rakyat berpendapatan kurang RM2,500 dengan harga kurang daripada RM35,000.

Idris berkata PPR Ayer Panas merupakan antara projek PPR terbaru di Melaka dengan PPR Sungai Putat dengan 336 unit telah siap tahun lepas dan PPR Paya Rumput dengan 600 unit bakal siap pada September 2016.

"Kita juga sedang memohon PPR di tujuh lokasi lain iaitu Lipang Kajang 500 unit, Pulai 400 unit, Kampung Tun Kudu 500 unit, Ayer Molek Darat 400 unit, Bukit Rambai 400 unit, Sungai Putat Fasa Kedua 400 unit dan Sungai Udang 600 unit," katanya.

**BERITA ONLINE
BERNAMA.COM**
TARIKH: 15 DISEMBER 2013 (AHAD)



SME Corp Salur RM17.6 Juta Kepada 114 Usahawan Di Terengganu Sejak 2007

Oleh Kamaliza Kamaruddin

KUALA TERENGGANU, 15 Dis (Bernama) -- SME Corporation Malaysia memperuntukkan RM17.6 juta kepada 114 usahawan di Terengganu yang mengusahakan pelbagai bidang perniagaan sejak 2007.

Daripada jumlah itu, sebanyak 29 peratus peruntukan disalurkan kepada bidang perniagaan berasaskan makanan dan minuman, simen dan perkayuan (17 peratus), minyak dan gas (14 peratus) dan tekstil serta pakaian (11 peratus) manakala bakinya disalurkan untuk bidang lain.

Timbalan Ketua Pegawai Eksekutif SME Corp Rohana Ramly berkata setakat ini pihaknya berpuas hati terhadap prestasi dan pembangunan industri Perusahaan Kecil dan Sederhana (PKS) di Terengganu.

"Setakat ini kesemua usahawan yang mendapat geran SME Corp menunjukkan prestasi pertumbuhan yang memberangsangkan, malah sentiasa memberi komitmen padu dalam apa sahaja usaha yang dijalankan untuk melonjakkan perniagaan mereka.

"SME Corp dengan kerjasama rapat agensi kerajaan yang lain, syarikat berkaitan kerajaan (GLC) serta pertubuhan bukan kerajaan (NGO) dan Yayasan Pembangunan Usahawan (YPU) Terengganu sentiasa memantau perkembangan perniagaan mereka," katanya.

Beliau berkata demikian kepada Bernama selepas majlis perasmian Bengkel Pembungkusan dan Penjenamaan & Seminar Persijilan Halal Malaysia yang disempurnakan oleh Pengerusi Jawatankuasa Usahawan, Pembangunan Luar Bandar, Kepenggunaan dan Koperasi Terengganu, Roslee Daud di sini hari ini.

Seramai 200 peserta IKS dari seluruh Terengganu menyertai bengkel itu yang diadakan selama dua hari yang berakhir esok.

Objektif penganjuran bengkel itu bertujuan memberi kesedaran kepada PKS berkenaan mengenai pentingnya persijilan halal dan pembungkusan serta penjenamaan inovatif bagi memenuhi keperluan pasaran global.

Rohana berkata peserta yang hadir berpeluang mempelajari tentang Akta Perihal Dagangan 2011 oleh Jabatan Kemajuan Islam Malaysia (Jakim), persijilan halal oleh Majlis Agama Islam dan Adat Melayu Terengganu (Maidam) dan pelbagai aspek kebersihan, kesihatan dan keselamatan oleh Jabatan Kesihatan Negeri Terengganu.

"Melalui bengkel ini juga, peserta didedahkan mengenai **SIRIM Berhad** dan Perbadanan Harta Intelek Malaysia (MyIPO) yang turut memberi fokus mengenai pentingnya penjenamaan inovatif, pembungkusan dan reka bentuk produk terhadap syarikat.

"Aspek pembungkusan dan pelabelan produk adalah antara ciri penting yang menentukan kebolehpasaran sesuatu produk untuk menembusi pasaran tempatan dan antarabangsa," katanya.

Bermula hari ini juga, masyarakat di sekitar Terengganu boleh datang ke Hotel Prinzpark di Kuala Ibai untuk melihat dengan lebih dekat 'Brand Transformer' iaitu sebuah kontena yang diubah suai, yang menempatkan pelbagai maklumat berkaitan perkhidmatan keusahawanan yang disediakan SME Corp.

Rohana berkata sejak diperkenalkan pada 2011, kontena itu telah menjelajah 18 lokasi, dengan tiga lokasi terakhir di Pahang dan Kelantan sebelum menutup tirai tahun 2013.

"Usahawan yang datang akan diberi penerangan mengenai peluang untuk mereka mendapatkan geran SME Corp serta peluang untuk mendapatkan maklumat mengenai manfaat penjenamaan dan pembungkusan produk.

"Sehingga kini, kira-kira 7,000 usahawan mengunjungi 'Brand Transformer ini," katanya.

-- BERNAMA